

АКАФИСТ СВЯТЫМ СЕДМИ ОТРОКОМ, ИЖЕ ВО ЕФЕСЕ

Кондак 1

Избранныи от воскресшаго плотию из мертвых Христа Бога, во уверение общаго всех воскресения миру явлению, предивнии отроцы, иже во Ефесе, прославляюще прославльшагося в вас Господа, похвальная пеня возносим вам, глаголюще: Радуйтесь, страстотерпцы Христовы, всемирнаго воскресения мертвых пречуднии проповедницы!

Икос 1

Ангелов Творец, ведый из начала несумненную крепость исповедания вашего, сотвори вас в лютых обстояниях провозвестники быти общаго всех воскресения, яко ангелоподобныя свидетели евангельскаго обетования. Сицевому о нас смотрению Божию дивящися, во благоговеинстве зовем сице: Радуйтесь, светлыя звезды грядущаго воскресения; Радуйтесь, преславнии лучи Христа Спаса воскресшаго. Радуйтесь, деннице великаго дне Господня; Радуйтесь, из домов неверных верная Христу чада явившиися. Радуйтесь, в чудный свет и свободу сынов воскресения призваннии; Радуйтесь, Духом Святым в проповедники глаголов живота вечнаго избраннии. Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 2

Видяще вас родители разум добр имущая, потщащася в чин воинский дружины царевы вас устроить; вы же, вся тленная мира презревше, в Сион горний к Царю небесному сердца своими востекосте, да яко друзи Божии и служителие тайны общаго воскресения вменени будете, поюще Христу: Аллилуиа.

Икос 2

Разум Христов чистыми душами воспряти сподобившеся, дивнии отроцы, посреде греховныя жизни сверстник ваших благодатию Христовою соблюдаеми, друг ко другу любовию и единением духа братие явистесь, и во едино свершени бысте. Сего ради примите от нас похвалы сия: Радуйтесь, единою банею пакибытия возрожденнии; Радуйтесь, любовию Христовою аки братие соединеннии. Радуйтесь, Церкви Божия чада возлюбленная; Радуйтесь, ангелов Божиих собеседницы. Радуйтесь, паче брашен естественных истинным хлебом жизни себе питавшии; Радуйтесь, сею пищею чрез благодать Святаго Духа от смерти в жизнь процветшии. Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 3

Сила Вышняго, таинники благодати в злостраданиях укрепляючи, сих венцем добропобедным исповедания увенчати пред человеки и ангелы сподоби, нас же научи пети Богу: Аллилуиа.

Икос 3

Имуще тщание в дом Господень на молитву по вся дни приходити, никакоже сего обычая отвергостеся, святии, гонению Декиеву бывшу; еже уведевше врази веры Христовы, царя о сем известити потщашася, обаче мучителя прещения на прославление вам силою Божию пременишася. Таковому убо о вас Божию промышлению радующеся, со умилением глаголем вам сице: Радуйтесь, темныя силы князя мира сего благодатию Христовою сокрушившии; Радуйтесь, злобу и коварство слуг его всепобедно посрамившии. Радуйтесь, козней и прещений их не убоявшиися, ниже смутившиися; Радуйтесь, помощию Божию видимо укрепившиися. Радуйтесь, яко древле Даниил в пещере львове, посреде мучителей сохраненни; Радуйтесь, силою Владычнею из среды их неврежденно изведенни. Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 4

Бурею ярости движим, злочестивый Декий царь во гневе святыя вопрошает: почто не бысте с нами в праздник богов, всю вселенную призвавших к поклонению? Емуже Максимилиан, един от седми, отвещает: имама единаго Бога и Царя, иже на небеси, Емуже приносим на всяк час жертву хваления, исповедания и моления, поюще Ему: Аллилуиа.

Икос 4

Слышав нечестивый царь, како веру вашу со дерзновением исповедаете, чести воинския лишити вас повеле, и тако испытания ваша Христа ради начашася, Христом скоропослушно в пречудное усение преображенная. Темже и ныне крепость в испытаниях от Бога умолите поющим: Радуйтесь, воеве царя земнаго, к воинству Царя небеснаго сопричтенни; Радуйтесь, честь земную оставльшии, да славу небесную восприимете. Радуйтесь, земныя чести за Христа лишенни; Радуйтесь, сего ради венцы нетленными от Него увенчанни. Радуйтесь, победы Его проповедницы явленни; Радуйтесь, славы Его вечныя седмочисленное блистание. Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 5

Божественныя любве теплотою греми, благодатию Христовою от мучителей покровени явилися есте, святии отроцы, Максимилиане, Иамвлише, Мартиане, Иоанне, Дионисие, Ексакустодиане же и Антонине, в летех юных красо-

ту внутренняго человека с лепотою внешнею сочетавающе и, яко ангели, в пламени исповедания вашего воспевающе Богу: Аллилуиа.

Икос 5

Видев злохитрый царь Декий зело благолепную юность вашу, на неколико дний и ослабу от уз вам дарует, прельстити вас ко отречению от Христа надеяся. Вы же, восвояси отшедше, сребро и злато нищим раздати потщастесь, ко исходу себе уготовляюще. Сего ради восписуем вам похвальная сия: Радуйтесь, законешаго во зле мучителя на некое милосердие подвигшии; Радуйтесь, младенческою кротостию вашею коварную злобу его на время угасившии. Радуйтесь, красотою сынов света злообразныя служители греха пленившии; Радуйтесь, Духа Святаго благодатию коварство их победно посрамившии. Радуйтесь, чрез раздаяние земных богатств сокровищем небесным обогатившиися; Радуйтесь, и нас взаим давати Богу научающи, да богатство неоскудеваемое на небесех обрящем. Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 6

Проповедует пещера горы Охлон чудную славу вашу, святии отроцы, дебри бо и вертепы ея молитвою вашею облагоухали есте, отонудуже на тверди церковней, якоже звезды славы небесныя, из мрака гробов чудно возсиявшыя, явистесь и нас Первоначальнику общаго воскресения Христу Богу пети научисте: Аллилуиа.

Икос 6

Возсияти хотя людем свет истины, мглу же заблуждения разгнати, Христос Бог снити вам во мрак могильный соизволи яко да послежде в дивнем востании вашем общее воскресение уверит. Пред таковым Божиим о вас благоволением преклоняющесь, возсылаем вам хваления сия: Радуйтесь, твердости ради исповедания от мук промыслительно избавленнии; Радуйтесь, и нас крепче за правду братися научающи. Радуйтесь, безболезненно подвиг ваш скончавшии; Радуйтесь, чудным сном почившии, во еже востанием от сего сна смерти мглу заблуждения разсеяти. Радуйтесь, в нетлении телес ваших Господем соблюденнии; Радуйтесь, прежде общаго воскресения изволением Божиим воставшии. Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 7

Хотя безбожный царь нуждею к идолослужению святыхя привлеци, паки праздник идольский устрояет и тыя нань привести повелевает; не обретшым же тех во граде Ефесе слугом его, родители их казнию устрашити тщится, но от сих извещен бывает, яко святии в пещере сокрышася, воспевающе Богу: Аллилуиа.

Икос 7

Новое устремление злобы мир явил есть, егда родители место покоища чад своих цареви открыта, и тако любви отчия к ним отрекошася. Сего ради ко избранником Божиим глаголем сице: Радуйтесь, миром отверженнии и небо восприявшии; Радуйтесь, Отца ради небеснаго отцы земными преданнии. Радуйтесь, отческою любовью Его в таинственном сне чудно сохраненнии; Радуйтесь, нетление улучившии и мир светом воскресения осиявшии. Радуйтесь, путь к сему дивному свету нам указующии; Радуйтесь, час кончины сбытием обетования Божия нам улаждающии. Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 8

Странное и преславное чудо всемогущества Божия на вас, святии отроцы, показася, камением бо по повелению Декиеву в пещере заграждения и печатию запечатленнии, сто и осмьдесят лет даже до дний царя Феодосия тамо спяще пребыли есте, воставше же аки живии, саддукейское мудрование посрамили есте, поюще Христу, вас воскресившему: Аллилуиа.

Икос 8

Весь седмочисленный исповедников лик, во гробе каменнем заключен быв, жизни вечная никакоже отлучися, но истекшим стом и осмидесятым летом сон от очес их произволением Божиим отрясся, и тако святии отроцы живии восташа, весь мир о воскресении всех уверяюще и нас пети научающе сице: Радуйтесь, упование общаго воскресения обетованием Божиим утверждающии, Радуйтесь, краугольного ради камене Христа Бога камением во гробе загражденнии. Радуйтесь, Его ради, во гробе запечатленного, печатию запечатленнии; Радуйтесь, Агнцем, взявшим на Себе грех мира, от уз смерти свободеннии. Радуйтесь, во уверение общаго воскресения, якоже Лазарь четверодневен, из гроба изведеннии; Радуйтесь, числу седми херувим, престолу славы Божия предстоящих, сообразнии. Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 9

Всякое естество ангельское возрадовася о чуднем по мнозех летех востании вашем и ужасашеся: како вы, преславнаго убо чудесе, о вас бывшаго, не ведуще, обычное целование друг другу подаете и утреннее пение Господу, аки вчера ко сну отшедшии, приносите, поюще: Аллилуиа.

Икос 9

Ветийствующий язык не возможет изрещи чудес Твоих, Господи, вемы бо, како блаженный отрок Иамвлих, многолетняго успения своего не разумея и во град за пищею ишедый, удивися, егда Ефес, Христовою верою издавна про-

священный, увиде, и Господа прослави, нас же глаголати сотвори таковая: Радуйтесь, делатели на ниве Господней, молитвенныя слезы обильно пролившии; Радуйтесь, в скудости и гонении почившии, во славе и богатстве воставшии. Радуйтесь, зрением торжества веры Христовы, во дни ваша гонимыя, по востании обрадованныи; Радуйтесь, победу Христа над миром яве узревшии. Радуйтесь, и нас на сию уповати научающии. Радуйтесь, от уныния нас ограждающии; Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 10

Спасти хотя Бог и в вере утвердити люди, сия о многолетнем успении Иамвлиха чрез древний пенязь, на торжище им принесенный, научает, епископу града сия уразумевшу и Бога прославившу с песнию: Аллилуиа.

Икос 10

Стена и утверждение веры явистеся, святии, человеком, в пещеру вашу пришедшим и ковчежец с хартиєю обретшым, на нейже имена ваша и кончины образ написана быша, во еже пети всем: Радуйтесь, семь избранных сосудов Божиих; Радуйтесь, вкупе со святыми мученики елеем радования помазанныи; Радуйтесь, семь светильников пред престолом Ходатая Бога и человек; Радуйтесь, семь труб благовестия втораго пришествия Сына Человеческого. Радуйтесь, семь ангел, благовествующих нам славу до конца претерпевших; Радуйтесь, яко седмисвещник золотый, церковь Божию украшающии. Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 11

Пение благодарственное Пресвятей Троице вознося, благочестивый царь Феодосий со тщанием во Ефес устремися, во еже святыя отроки видети, и семь дний тамо пребываше, дондеже сии, главы преклонше, дух свой Господу предаша, купно с ними победную возсылая песнь Христу Богу: Аллилуиа.

Икос 11

Светильницы, тьму ереси разгоняющии, явилися есте, святии отроцы, светом нетления вашего сияющии и блаженным по востании паки успением истину грядущаго живота утверждающии, саддукейское бо мудрование посрамивше, вся раздоры церковныя утишили есте, общее воскресение вкупе с древним Лазарем уверяюще. Темже, благодаряще о сем Господа, со умилением зовем вам: Радуйтесь, скорбное житие наше добрым упованием осиявающии; Радуйтесь, посреде волн жития сего к пристанищу небесному нас направляющии. Радуйтесь, яко звезды, во отишие блаженнаго покоя в чертозе Христове нас путеводящии; Радуйтесь, блаженство вечное, скорбящим уготованное, благовествующии. Радуйтесь, яко недостойны суть страсти нынешняго времени к будущей

славе, уверяюще; Радуйтесь, доблии вестницы царства небеснаго бывшии. Радуйтесь, страстотерпцы Христовы, всемирнаго воскресения мертвых пречуднии проповедницы!

Кондак 12

Благодать дадеся вам от Бога, во еже вся любящая и чтущия вы в чудный свет Его руководствовати. Темже и наша жизни скорбный путь крепкою надеждою воскресения озарите, от греховныя погибели нас соблюдайте и в час смертный нам предстаните, да вашим заступлением невечерняго света величества Божия и мы грешнии достигем, идеже с лики праведных воспоим о вас Богу: Аллилуиа.

Икос 12

Поюще дивное прославление силы Божия в вас, святии отроцы, ублажаем вы, яко заступники и молитвенники наша пред Господем, и с любовию, святей иконе вашей предстояще, возглашаем вам хваления сия: Радуйтесь, в Российской земли града Старицы похвало и утверждение; Радуйтесь, вся окрестныя веси славою благодатныя помощи вашае исполнившии. Радуйтесь, болящих младенцев прибежище и исцеление; Радуйтесь, скорбей родителей их неложное врачевание. Радуйтесь, всем любящим и чтущим вы покрове и ограждение; Радуйтесь, всего мира христианскаго помощи и заступление. Радуйтесь, страстотерпцы Христовы, всемирнаго воскресения мертвых пречудные проповедницы!

Кондак 13

О чуднии отроцы, светом небесныя славы вашае и уверением нескончаемаго живота скорбный путь жития нашего озаряющий! Приимите малое сие моление наше и не отрините нас, притекающих к вам: молитесь присно всех Владыку, да и мы райскаго чертога не лишени будем, но вкупе со святыми воспоим тамо Христу Богу: Аллилуиа.

(Этот кондак читается трижды, затем икос 1 и кондак 1)